

JINOIN LAĻ IN

Kōttōpar ko an katak in:


- Kwaļok bwe ejjeļok juon men ear pād mōkta jān an Anij kōmmanen im bwe Ear kōmmanen aolep men jān ejjeļok.
- Kwaļok mwilin Anij im kajoor eo An kōn wāween An kōmmanen aolep men.

Meļeļe ko reļap ilo katak in:

- Anij ear kōmmanen men otemjej jān ejjeļok.
- Wāween an Anij kōmmanen aolep men ej kwaļok An kajoor im mālōtlōt eļap.

Ilo ad katak kōn plan an Anij nān lōmōoren armej, jaar lo bwe Anij ear mōkta jān aolep men, im E kwōjarjar otem kwōjarjar. Ilo mool Anij ej jān indeeo nān indeeo. Ejjeļok jinoin Anij. Naan ko An, Baibōl, rej waļok jān E, kōn men in jen roņjake im pokake.

Jaar barāinwōt lo bwe Anij e utiej im kajoor jān aolep jetōb ro kōnke ear kōmmanen er. Anij ej kwaļok kajoor eļap ilo elōñ wāween, im mōttan men ko reļap me rej kwaļok kajoor eļap an Anij ej An kōmmanen men otemjej. Ewor elōñ lōmņak ilo raan kein kōn wāween an laļ in im armej waļok, bōtab Baibōl ej kwaļok nān kōj bwe Anij ear kōmmanen men otemjej.



1. Anij ear kōmmanen men otemjej.

Eļāñne je kōņaan bwe en emman ad meļeļe kōn karōk eo An Anij nān lōmōoren kōj, e aikuj jimwe ad meļeļe kōn wāween an Anij kōmmanen laļ in.



Jenesis 1:1 Ilo jinoin Anij Ear kōmmanen lañ im laļ.



Eļāñne kwaar lōmņak in kalōk juon em, elmān am naaj kar kōmmani? Kwōnaaj kar via elōñ aļal, dila, tiin, block im aer ļok wōt. Kwōnaaj kar kōmmani juon karōk. Ñe ejjeļok am kabwebwe in em, kwō ban kar kōmmane. Ewor ke jabdewōt men kwō maroñ kōmmanen jān ejjeļok? Jaab.



Ke Anij ear kōmmanen laļ in, Ear kōmmane jān ejjeļok. Ej meļeļe in bwe Ear jab aikuj jabdewōt men nān kōmmane laļ in. Ear jab aikuj aļal, dila, ak cement. Joņan an kajoor Anij, Ear kōnono wōt im ear waļok āindein.



Jeremaia 32:7 A, Irooj Jeova, lo, Kwe eo Kwaar kōmmanen lañ ko im laļ kōn Am kajoor eļap im kōn peōm erļoke. Ejjeļok men Kwō bane.

Ñe armej rej kōmmane juon wa car ak juon computer, eļap aer kōttōbalbal. Eļap aer plan im lōmņak e mōkta jān aer lukkuun in kōmmane. Meñe men ko im Anij ear kōmmani rej mwilaļ, im e pen ļok kōmmani jān jabdewōt men emōj an armej kōmmane, e mōkaj ļok an Anij kōmmani jān men ko im

armeĵ rej kōmmani. Lōmṇak kake! Ear kōnono wōt, im aolep men ko raar waḷok. Ear kōnono wōt im aolep iju ko raar waḷok ilo meĵatoto. Ear kōnono wōt im aolep ek ko kajjo wāweeir raar waḷok ilo loĵet. Ejjeḷok kajooren naan ko an Anij ke?

Anij e kajoor jān:

- enjeḷ ro - Jetan - timoṇ ro - aolep armeĵ!

* **Anij e kajoor jān aolep.**



Hibru 11:3 Kōn tōmak je jeḷā bwe eṃōĵ kōmanman laḷ kōn Naan in Anij...

2. Anij ear kōmanman aolep men kōn wōt an kōnono.

Elmān an kar Anij kōmmani loĵet im āne? Elmān An kar kōmmani meĵatoto im iju ko? Elmān An kar kōmmani ek ko i loĵet, bao ko i meĵatoto, im menninmour ko ioon āne? Kōn wōt An kōnono!



Jenesis 1:3 Im Anij ear ba, En meram; im e meram.

Elmān an Anij kar jeḷā kilen kōmmani men kein? Kōĵ, jaar aikuj in katak. Ke je loṭak, ejjeḷok men je jeḷā. Juon niñniñ e ñak aolep kain. Jej katak:

- kōn ad lo bar jet armeĵ kōmman jet men
- kōn ad school
- kōn ad baj kajjioñ (im jet iien bōd im bar kajjioñ)

Ak wōn ear katakin Anij? Ejjeḷok! Ejjeḷok An aikuj bwe bar juon en katakin E. Ear ejjeḷok bar juon ilo jinoin - E wōt make iaan! Anij e make jeḷā aolep men.

Armeĵ re maroñ school iuṃwin elōñ iiō im bōk aer degree in taktō ilo juon kain katak, ainwōt katak kōn jet kain ek ilo loĵet. Bōtab, (1) raar bōk elōñ iiō bwe ren katak, im (2) renaaj make ba bwe re jab jeḷā aolep men kōn ek ko, im (3) ewor bar bwijen men ilo laḷ in me re jaje kake.

Ñe armeĵ rej kōmmane juon men, rej aikuj lōmṇake moṭka. Reĵ aikuj in kajerbal jet tool ak kein jermal. Jet iien re aikuj kajerbal jet mejiin ak juon engine bwe en tōprak men eo im rej kōmmane. Jet iien rej aikuji jet ri jipañ. Anij ear aikuji jabdewōt iaan men kein ke? Ekar jab. Ear kōmanman meĵatoto, laḷ in, im aolep kobban laḷ in kōn kajoor in ainikien. Ejjeḷok ear jipañ e.



Kwōn barāinwōt lōmṇak kōn men in. Ñe kwōĵ lōmṇak in ekkal eṃ, kwōĵ moṭka etal ñan MJCC im wia brick, ak kwōĵ etal ñan Do It Best ak Ace Hardware im wia alaḷ im plywood. Ñe juon kōrā ej lōmṇak in keke nuknuk ej moṭka etal ñan moñ Bilimon ak moñ Formosa im wia an yard. Ejjeḷok juon armeĵ e maroñ kōmmane jabdewōt men jān ejjeḷok im kōn kajoor in ainikien. Bōtab eñin wāween an kar Anij kōmanman aḷ, iju ko, im aolep men ko ilañ im ilaḷ. Jen lōmṇak kiiō kōn jet iaan men ko ilo laḷ in me Anij ear kōmmani kōn kajoor in ainikien.

3. Laḷ in ilo jinoin



Jenesis 1:2 Im laḷ ejjeḷok wāween, im ejjeḷok kobban, im e marok ioon mejān loṃeto, im

Jetōb an Anij ej pedowane mejān dān ko.

Ilo jinoin, ejjeļok wāween laļ in, im ear marok. Ear ejjeļok meram ñan jidik, im ear ejjeļok āne e mōrā. Ear ejjeļok men me e mour ioon laļ.

Jetōb an Anij ear pād ilōñin dān ko im pojak in kōmman men otemjej. Ewor juon wōt Anij, ak Ej waļok ilo jilu, im erjel raar bōk kuṇaer ilo jermal in kōmanman men otemjej. Jon 1:3 im Kolosse 1:16 rej ba bwe Jisōs ear kōmman men otemjej. Je jab maroñ meļeļe kōn kajoor eo eļap an Anij, im je jab maroñ meļeļe kōn jilu ilo juon.

4. Raan eo kein ka juon: Anij ear kōmanman meram (Jenesis 1:3-5)



Jenesis 1:3 Im Anij ear ba, “En meram,” im e meram.

Eokwe, bwe jen kar maroñ in kōnono wōt, im e waļok meram! Ak je jab maroñ. Im jej aikuj meram eo me Anij ear kōmanmane.

Ñe jej lo aļ ak iju ko, ak jej kabwil juon tōma, jen kememej bwe aolep meram ej itok jān Anij. Ear kōmanmane jān ejjeļok. Eṃōj an scientist ro katak im meļeļe jet men kōn meram, im kōj otemjej jej lo tokjān meram, ak Anij e meļeļe aolepen, bwe E eo ear kōmanmane.



Jenesis 1:4 Im Anij ear lo meram bwe eṃman; im Anij ear kōjepel meram jān marok.

Meram eo Anij ear kōmanmane eṃman. E jab maroñ kōmanman juon men nana.

Kōj, ejjeļok ad maroñ in kōmanman juon men me e jejjet im weepan ilo mool. Men ko jej kōmanmani:

- re moļok
- rej aikuj bwe armej ren karpene
- armej ro jet rej kōmanman men eṃmanļok

Aolep men Anij ear kōmanmani reṃman im weepan kōnke Anij e weepan im kwōjarjar.



Sam 18:30 Kōn Anij, iaļ eo An eweppān...

Anij ear kōjepel meram jān marok im likūt etan meram Raan im etan marok Boñ. Men in ear raan eo kein ka juon ilo laļ in.

5. Raan eo kein ka ruo: Anij ear kōmanman lañ (Jenesis 1:6-8)



Jenesis 1:6 Im Anij ear ba, “En juon mejatoto eolapan dān, bwe en kōjepel dān ko jān dān ko.”

Mejatoto in ej pād ilōñin laļ in im ej kōpool laļ in. Elōñ dān ilo lañ ilo mejatoto eo, im elōñ ilo laļ in.

Ñe jej reilōñļok, jej lo jidik wōt in aolepen mejatoto in lañ. E kanooj ļap. Ak Anij ear kōnono, im ear waļok, im ear eṃman!

6. Raan eo kein ka jilu: Anij ear kōmmanman āneo, lojet, im aolep keinikkan im wōjke (Jenesis 1:9-13)



Jenesis 1: 9,10 Im Anij ear ba, “Dān ko iumwin lañ ren koba ilo juon jikin, im en waļok āne e mōrā;” im ear āinwōt. Im Anij ear likūt etan āne e mōrā Laļ, im ijo dān ko rej koba, Ej likūt etan Lometo; im Anij ear lo bwe emman.

E kanooj laļ lojet eo, im e kajoor no in lojet. Im Anij ear kōmmane ilo juon wōt raan!



Jenesis 1:11 Im Anij ear ba, Āne en kadek wūjooj, im mar rej jebar ineer, im wōjke ko rej jebar leer kajjo wāweir...

Scientist ro rej ba bwe ewor tarrin 250,000 kain ut ko ilo laļ in. Rej lukkuun aiboojoj im enno bwiieir. Takto ro rej kajerbal 10,000 kain ut ko ñan kōmmani wūno ko im jej kajerbali ilo raan kein. Wōn ilo laļ in e maroñ lōmṅaki kain ut ko joñan rōt in? Ejjeļok! Anij wōt e maroñ kōnono im ej waļok 250,000 kain ut ko im rej oktak jān doon.



Kiiō, jen lōmṅak kōn kajjitōk in: Anij ej aikuji aolepen ut kein ke? E jab! Armej rej aikuji ke? Jaab. Innām etke Anij ear kōmmanman joñan rōt in? Bwe En kwaļok joñan An kajoor im An mālōtlōt.



Sam 19:1 Lañ ko rej kōnnaan kōn aiboojoj eo an Anij, im mejatoto ej kwaļok jermal an Peen.

Elaññe Anij ear kōmmane juon ak ruo kain ut ak juon ak ruo kain ek, men kein renaaj kar bwe ñan kwaļok joñan aiboojoj eo an ke? Re ban kar! Elaññe Anij ear kōmmani juon ak ruo iju i mejatoto, men in enaaj kar bwe ñan kwaļok aiboojoj eo An. Eban kar! Anij ear kōmmanman aolep men kein bwe en kwaļok kajoor im aiboojoj eo An.

Anij ear barāinwōt kwaļok An emman im jouj ilo An kōmman men in eddek ko. Jej kajerbali leen wōjke im vegetable ñan mōñā, jej bōk kane jān wōjke, jej kōmman elōñ men jej aikuji jān wōjke ko, im je mōṅṅō ñe jej lale ut ko re aiboojoj me Anij ear kōmmanmani. Anij ear letok juon laļ emman bwe kōmin jokwe ie.

* **Anij e jouj im emman.**

Anij ear kōmman bwe en wor ine ko ilo men in eddek bwe ren jebar leir im kōmman bar jet men in eddek. Juon wōjke ni e jab kwaļok ine in mā, im juon ut raan ñan raan e jab kōmman rose ak ine in rose. Kwe im ña, jej kōmman jet men, ak rej etal im mor. Innām jej aikuji bar jino im kōmman bar juon men. Ak Anij ear kōmman bwe en wor maroñ ilo aolep keinikkan bwe ren kōmman bar jet.



Ñe jej lale juon ut, jej lo bwe ewor kakōļle ke me rej kwaļok ut rōt men eo. Kab ilo ine eo, aolep meļeļe kōn color im bwin ej pād ie. Elaññe jej bōk juon kein lale, āinwōt microscope, jej lo bwe men ko ilowan ut eo rej jermal ippān doon. Ewor iaļ in dān im wāween an ut eo bōk kajoor jān aļ im dān im bwidej bwe en kōmman oxygen im men ko jet. E alikkar bwe ekkar im laajrak aolep men lowaan. E alikkar bwe ear wor juon Ri Kōmmanman, kōnke men kan

re ban kar make waļok im āindein bwe rej jermal ippān doon.

7. Raan eo kein ka emān: Anij ear kōmmanman aļ, allōñ, im iju ko (Jenesis 1:14-19)




Jenesis 1:14 Im Anij ear ba, “En wor meram ko i mejatoto in lañ, bwe ren kōjepel raan jān boñ, im ren pād kōn kakōļle ko, im kōn añōneañ im rak ko, im kōn raan ko, im iio ko;



Jenesis 1:16 Im Anij ear kōmmanman meram ko ruo re lap, meram eo elap bwe en irooj in raan, im meram eo e dikļok bwe en irooj in boñ; im Ear kōmman iju ko barāinwōt.

E kabwilōñlōñ men kein Anij ear kōmmani! Aļ eo ej 93 million mile jān laļ in, ak jej eñjake an māānān im lo an meram! Eļañne ewor juon tōma iturin juon em ilo Arno, kwōnaa kar loe jān Laura, Majuro ke? Jaab. Joñan an kilep aļ eo, e maroñ wor 1 million laļ ainwōt laļ in ilowan!

Iju eo e paak tata ñan laļ in ej Alpha Centauri. Ej 4.2 (iio in meram) light year ettoļok. Meram ej etal ilo 186,000 mile ilo juon wōt second. Eļañne kwō maroñ kelok im joñan an mōkaj eñ, innām kwōnaaj aikuj in kelok iumwin 4 jimma iio ñan tōpar iju eo e paak tata. Juon light year ej 5,865,696,000,000 mile! Aolep iju ko jej loi rej mōttan doulul eo ad me rej ña etan Milky Way Galaxy. Ewor billion iju ilo galaxy in. Bōtab, ewor bar million galaxy rettoļok, im ilo aolepeir ewor billion iju! Jet iaan iju ko re kanooj kilep jān aļ eo ad!



* **Anij e pād ijoko otemjej.**

Emōj an armej etal im jutak ioon allōñ eo, ak je jab maroñ etal ñan iju eo e paak tata. E pen ke an Anij etal ñan iju ko rettoļok? Jaab.



Jeremaia 23:23, 24 “Ña juon Anij epaak ke,” Jeova ej ba, “im jab juon Anij ettoļok? Eļañne juon armej ej kūttiliek ilo jikin kūttiliek ko, I ban lo e ke?” Jeova ej ba. “I jab kobra lañ im laļ ke?” Jeova ej ba.

Ewor elōñ kien me Anij ear kōmmani kōn men kein ilo mejatoto. Je maroñ jeļā ñāāt eo laļ in ej kōpool aļ eo, im ñāāt iien tak aļ ak tulok aļ, im ñāāt ibwijtok im patļok. Anij ej kōmman aolep men ilo jimwe im ekkar. Men kein rej katakin kōj elōñ men kōn Anij.



Sam 19:1,2 Lañ ko rej kōnnaan kōn aiboojoj an Anij, im mejatoto ej kwalok jermal an pein. Raan ñan raan ej katqorļok naan, im boñ ñan boñ ej kwalok jeļālōkjen

8. Raan eo kein ka ļalem: Anij ear kōmmanman aolep menninmour ilo lojet im aolep bao (Jenesis 1:20-23)



Jenesis 1:20 Im Anij ear ba, “En lōñ an dān ko kemour menninmour ko, im bao ko ren kākī ioon laļ, ilo mejan mejatoto im lañ.”

Bao eo edik tata ej ruo inch aetokin im 1/10 ounce eddoin. Bao eo e kilep tata ej 8 ne utiejen im 300 pound eddoin. Elōñ 8,700 kain bao ko rej pād ilo laļ in kiiō. Ek eo edik tata ej 2/5 inch aetokin im 1/16 ounce eddoin. Ek eo e kilep tata ej 60 ne aetokin im 8,000 pound eddoin.



Jān iien ñan iien, armej rej lo juon kain bao ak juon kain ek me re jañin jelā kake mokta. E kanooj kajoor Anij, im E jouj bwe Ej kōmman men ko remman bwe jen lale im kajerballi.

Armej re jab maroñ kōmman juon bao e dik. Ewor cell im molecule re dik me elap aer pok im kabwilōñlōñ. Men kein rej kwaḷok bwe ewor juon Ri Kōmanman, im elap An kajoor im mālōtlōt.

9. Raan eo kein ka jiljino: Anij ear kōmanman aolep menninmour in āne im aolep men in tōbalbal (Jenesis 1:24, 25)




Jenesis 1:24 Im Anij ear ba, Laḷ en kemour menninmour kajjo wāweir, kidu ko rewie, im men otemjej rej tōbalbal...

Scientist ro rej ba bwe ewor 2,000,000 kain men in tōbalbal ko ilo laḷ in. Elōñ 100,000 kain babbüb ko ipeḷaaken laḷ in. Ewor 4,000 kain menninmour ko ilo laḷ in. Menninmour eo edik tata ej 9/100 ounce im menninmour e kilep tata ej 100 ne aetokin im 150 ton eddoin. Jet menninmour rej jekjekin bao im rej jelā kāḷok. Jet menninmour rej jekjekin ek im re jelā aō.

Anij ej aikuji aolep in menninmour kein ke? Jaab! Armej rej aikuji? Jaab. Innām etke Ear kōmmani? Bwe En kwaḷok An kajoor im An mālōtlōt. Jete ek ilo lojet? Elōñ tujin kain ek ko ilojet. Elōñ tujin kain men in tōbalbal ko. Elōñ tujin kain menninmour in āne. Elōñ million iju ko i mejatoto im rej million million mile ko etto ḷok jān doon.

Anij ear kōmanman men kein aolep kōn An kōnono wōt. Lōmḷak kōn men in. Ke Anij ear ba, “En meram,” ear aikuji kattar jete minit bwe en waḷok meram? Ejjelok. Ear jab aikuji kattar ñan jidik. Ear baj kōnono im meram ear waḷok.



Aolep raan, ewor kakōlle ipeḷaakōd bwe:

- ewor juon Ri Kōmanman
- Ri Kōmanman elap An kajoor im mālōtlōt
- Ri Kōmanman in e jouj im yokwe
- Ri Kōmanman in ear kōmanman aolep men ilo laajrak; e nana pok im jabde Ippān
- Ri Kōmanman in e kwōjarjar

Anij e kajoor jān men otemjej. Anij e kajoor jān enjel im timon otemjej. E kajoor jān Jetan. Anij e kajoor Bōtata. Eḷañne Anij e kajoor jān aolep im ear kōmanman aolep, ej meḷeḷe in bwe e kajoor jān jerowwi. Kōn men in jān kakaiur kōj ñan ad kabuñ ñan E im pukot ta ankilaan ñan kōj.

Kajjitōk ko:

1. Etke jej ba bwe ej aikuji wor juon Ri Kōmanman, im men ko ilo laḷ in raar jab make waḷok?
2. Etke Anij ear kōmanman bwijen iju im elōñ kain ut?
3. Anij ear kajerballi ta bwe En kōmanman aolep men?
4. Etke Anij ear maroñ in kōmanman aolep men bwe ren emman?